

19 APRILIE

**SLUJBA
SF. IERARH-
MARTURISITOR
VICTOR
OSTROVIDOV
AL GLAZOVULUI**

MINEIUL-RU



СВЩНСП

ВІКТОРЪ
ЕП-МЕЗЪОСКИИ

Служба

священномученику

Виктору Вятскому и

Глазовскому

На велицей вечерни поем Блажен муж: 1
антифон. На Господи воззвах, стихирь
праздника 3, и святаго 5, глас 8:

Подобен: О преславнаго чудесе:

Безбожие якоже ино пресекая море / в небесное
царство вшел еси / достойно, Викторе, / идеже
сладоу поток истекает, / и свет непреложный
сияет / Христа светодавца, / егоже
наслаждающесе / вкупе с мученики и
исповедники / моли спастися душам нашим.

Словом души управляя, / божественный
строитель показался еси, / мудре Викторе, /
тайныя Церкви столп и правды уста / в
изгнаниих горьких и в темнейших местех
затворяем / райское селение в уме обносил еси /
и терпением оное стяжал еси / от Христа Бога /
и Спаса душ наших.

Яко тезоименитна звание прием, / мудре
Викторе, / облаки лжи разгнал еси / и истину
утвердил еси / в стезях правых Богу работая, /
веру Божию до смерти опасно храня, / взят быв
к неизреченной славе / Христа Бога нашего, /
Егоже моли спастися душам нашим.

Яко свидетельства течение скончав, / победы
венец восприем, / славне Викторе, / ныне на
небесех ликуеши / со всеми мученики
российскими / нам же мощи своя оставил еси, /
от нихже цельбы даются приходящим с верою, /
отступником на посрамление, / истинней же
Церкви на утверждение.

Словесы твоими леств Сергиеву помрачая, /
мудре Викторе, / мудростию Христовою
озаряем, / просиял еси на тверди церковней /
якоже звезда пресветлая / и пути правыя
верным уясняя / и злочестивыя заграждая уста,
/ Христу Царю работая / Егоже моли спастися
душам нашим.

Слава, глас 4:

Вятская страна и вотский край / стяжа тя, отче,
пастыря предобра / и учителя истиннейша /
душу свою за овцы полагающа, / егоже гласа
верныя послушаша / союз советов лестных
отвергоша, / и исповеданием и мук страданием

/ въздоша с тобою вкупе к пастыреначальнику
единому Христу, / к отечеству нетленному, /
земнаго вещества служителем неведомому.

И ныне: праздника.

Вход, прокимен дне и чтения святаго 3 мученичны.

На стиховне стихиры святаго, глас 1:

Подобен: Всехвальнии мученицы:

Оставив долувлекущая мудрования, /
последовал еси Христу, / славне мучениче
Викторе, / святителю кротчайший, / и крест
скорбей злоютых прием, / восшел еси на
первое достояние радуясь, / Христову доброту
созерцая / Егоже сияньми ум же и мысль озарив
/ просвещаеши ны чудесы твоими.

Стих: Многи скорби праведным / и от всех сих
избавит я Господь.

Огнем разжизаем / божественнаго рачения, / не
убоялся еси, Викторе, / тесным путем
шествовати, / сквозе море неверия и
отступления / прешел еси яко посуху / на
Христа единого взирая / и многим был еси путь
ко спасению, / и ныне молися присно спастися
нам.

Стих: Блажен муж, бояйся Господа / в заповедех
Его восхощет зело.

Отче священне Викторе, / православия светом
облистав, / озарил еси мысли верных, / и
Сергия зеницы омрачив, / отринул еси от
Церкве Христовы / яко ярму неверных
подклоншася. / Темже светильника тя
стяжавше вси, / священную память твою /
почитаем и ублажаем.

Слава глас 4:

Единоумием едино мысляще, / Виктор со
Нектарием прекраснии, / с нимиже Синесий и
Иларион мученицы, / вятския страны удобрение
/ и Церкве Российския похвало / исповедницы
веры пламеннии / и сынов противления
обличители / вкупе с патриархом Тихоном и
святым царем Господу предстоят / и молят
спастися нам.

И ныне: праздника.

Тропарь, глас 4:

Победы тезоименит воистинну, / Викторе
вятская похвало, / узам и скорбем темничным
вдался еси веры ради, / слово истины
исправляя, / и лесь безбожных посрамил еси, /
моли Христа Бога / спастися душам нашим.

дважды и Богородице Дево единожды.

На утрени

На Бог Господь тропарь праздника дважды,
Слава, святого, И ныне: праздника.

По 1 кафизме седален праздника, Слава и ныне:
тойже.

По 2 кафизме: седален святого, глас 3: Многая
гонения и неослабная искушения претерпел еси,
Викторе, православию сияя и вся зрящая
просвещая, терпению твоея крепости бесов
состояния ужасив, возмогл еси сим,
священномучениче.

Слава ин, глас 8:

Тяготу недугов, страсти сердечныя и болезни
телесныя, всяку же ину скорбь находящую
претерпел еси Викторе, Христа ради, и Царствие
небесное получил еси, в немже ныне ликующе,
поминай нас совершающих память твою.

И ныне: праздника.

Величание: Величаем тя, священномучениче Викторе, и чтем честная страдания твоя яже за Христа претерпел еси.

Псалом избранный: Бог нам прибежище и сила, помощник в скорбех, обретших ны зело.

По полиелеи седален глас 1:

Исповеданием веры правой ныне красится Виктор, Глазовская и Вятская похвало, Церкви мучеников слава, лукавым же слугам сталеименнаго укор и обличение, тии бо спасти душа своя текоша, сей же отдаде живот свой за Христа Бога, и Спаса душ наших.

Слава и ныне: праздника или богородичен.

Степенна 1 антифон 4 гласа. Прокимен, глас 4: Праведник яко финикс процветет: Стих: Насаждени в дому Господни:

Евангелие от Луки зачало 63.

Воскресение Христово видевшие: и псалом 50.

Стихира, глас 6: Сребро разженое и злато явистася / мученик новых множество, / пещь бо Господня тех испытываше, / и десница Вышняго разделяше, / с теми вкупе Виктор славный, / в кротости и ревности Владыце своему подобен

сый, / светильник явися Церкви российския, / истины стези верным уясняя.

Канон праздника со ирмосом на 6, и святого на 8. Катавасия праздника.

Канон, глас 1:

Песнь 1

Ирмос: Поим песнь новую Богу, от работы фараоновы избавльшему сыны Израилевы, и в пустыни тыя препитавшему, яко славно прославися.

Радуются ныне лица мученичестии, зря исповедника новаго течение и еже о вере борение, вопиюща: слава Ти, Христе, мучеником крепость.

Возшумеша ныне воды злобы и разлишася реки нечестия еже подвигнути дом души твоея, мучениче, но камень имел еси основание, вопия: слава Ти, Христе, мучеником крепость.

Обыдоша мя богоборцев полки, претя муками и скорбьми злыми, но укрепи сердце мое Бог спасения моего еже вопити: слава Ти, Христе, мучеником крепость.

Богородичен: Восток Дево пречистая была еси Солнца правды, имже неразумия тьмы избавихомся.

Песнь 3:

Ирмос: Утверждение ми буди, основавый землю на водах, яко несть свят паче Тебе, Господи.

Умертвив плотския сласти воздержанием, огонь страстей росю Духа попалил еси, Викторе, и воду живу стяжа в сердце своем, в вечную жизнь текущую и вопиющую присно: несть свят паче Тебе, Господи.

Исполнися издетска сердце твое, Викторе, ревности о иже во тьме неверия сидящих людех, и манием Божиим познаша тя людие чувашстии и иерусалимляне пастыря, веры глашатая и светом богознания просвещающа, учаща пети: несть свят паче тебе, Господи.

Законы Божественными огражден, беззаконных соборища уклонился еси, спасая стадо твое, отче Викторе, и дела учаще, яко никтоже имать власти пременять или отщетевати вся, яже отцы святии рекоша и соборы сих утвердиша.

Богородичен: Мольбу из тебе воплотившемуся Слову сотвори Богородице Дево, яко да нас ущедрит смиренных.

Кондак и икос праздника.

Седален, глас 1: Полк мученик новых смерти не убоюшася, от нихже един бе святитель Виктор, исповедник доблий, жизнь бо обрет Христа, скорби горчайшия в сладость вменил есть, и узы темничныя в радование. Слава укрепльшему тя Богу, слава Венчавшему тя, слава Деющему тобою всем исцеления.

Слава и ныне: праздника.

Песнь 4:

Ирмос: Слух силы твоея пророк Аввакум услышав, убоюся, дела твоя, Боже, разумев, ужасеся и вопияше: слава силе Твоей, Господи.

Волцы хищницы иже во двор овчий внити желая, обретоша тя стену крепку и дверь затворенну, мучителем тя предаша, ты же сим радостию вдадся еси, вопия: слава силе Твоей, Господи.

Соловецкий остров иже мученики новыми освященный и кровьюми и поты их окропленный, прием тя, Викторе яко бисер драгий, ин ко иному прилагая и собор святых собирая, вопиет: слава силе Твоей, Господи.

Бездна терпения и милости быв, отче Викторе, в молитве присно пребывая и врагом кротко прощая, вселил еси Христа в душу свою, вся твоя к Нему шествия направляющая, Ему же пел еси: слава силе Твоей, Господи.

Богородичен: Воплощенное из тебе, Чистая, пройде Слово, падение первозданных за милосердие щедрот исправляй.

Песнь 5

Ирмос: От ночи утренююще, тебе славу воссылаем, Господи Боже наш, твой мир даждь нам, яко разве Тебе бога иного не вемы.

Уклонися ити путем удобным и широким мученик Виктор, и внити в Царствие потщася путем тесным, имже истина едина входит, Христос, благословен Бог отец наших.

Отроком святым подражающе, не поклонился еси, мучениче, идолу громадному иже безумнии людие себе изваяша и нарекоша его советище, но пребыл еси непоколебим, и жерцов того оплевал еси, вопия Христу: разве тебе иного бога не вемы.

Ныне предал есть нас Господь в руке злых и безбожных, да испытает люди своя и очистит гумно Свое, кротко рекл еси отче мучителем, и

несть ныне пути иного аще не исповедания веры в Него и обличения якоже Филипп святыи и Предтеча нам явиша.

Богородичен: Яко небес вышшая и херувимов лучшая, всевятая Дево, с мученики моли Творца и Избавителя спастися нам.

Песнь 6

Ирмос: Со Ионою вопием Ти, Господи, со гласом хваления молящеся: возведи от тли живот наш.

Погрузися во дно адово, и поглощена бысть китом безбожия Церковь русская, но возопиша пастыри Христови: возведи от тли живот наш.

Мерзка есть служба сергиевцев, хлеб же их скверна в очах Господних, вопиял еси пастырь добрый овцам, сего ради бежим их, да не внидет с нами в суд Господь.

Возжег еси себе отче Викторе, огнем ревности по Церкви, юже ти вручи пастыреначальник Христос, учаще блюсти себе обновления онаго, и пребыти в вере, юже Господь апостолом предаде.

Богородичен: Тя светлый облак солнца умнаго, Богорадованная, поюще славим: сердца наша

просвети, тьму отгоняючи всю уныния и страстей, Богоневесто.

Кондак, глас 4:

Победы венец с небесе прием, преславне Викторе, просиял еси учении и страдании паче солнца, тьму безбожия и ереси отгнав, спасай верою празднующих память твою.

Икос:

Зиме злобы прешедши, благодати весну достигл еси святителю, и процвете ти вечныя жизни цвет, вонями веселящ Божиих оружников и красящ главы исповедавших Того пред мучители. Сих веселия исполнен сый, не забуди нас молитвами си да выну с тобою зовем Отцу и Сыну со Святым Духом: Аллилуия.

Песнь 7

Ирмос: Пещь, Спасе, орошашеся, отроцы же, ликующе, пояху: отцев Боже, благословен еси.

Смущенным же пастырям церковным, и лютою зимою зол истаеваемым, взывал еси отче Викторе, аще соль обуяет, чим верные осолятся? Не утрашимся ити за Христом, вопиюще: отцев Боже, благословен еси.

Вдался еси воем безбожным, Виктор, и яко адамант твердейший показася, имел бо еси Христа в сердце и Духа Святаго во устнех вопиюща: отцев Боже благословен еси.

Не убояся советский мучитель темничным тя мукам предати, но тщи отыде от тебе, огнем исповедания твоего попаден, темже яко немощный в места северная тя посылает.

Александра верная и Ангелина преподобная вслед тебе текоша, Виктор, в чертог небесный внити желая, и с тобою воспети песнь спасительную: отцев Боже благословен еси.

Богородичен: Плоть прият из тебе, Чистая, Содержай тварь всю и земли концы, и умрети нас ради изволи: Егоже зрящи воскресша со славою от гроба, возвесилися.

Песнь 8

Ирмос: Царя славы и Победителя смерти, Иисуса Назорея, Того превозносите во вся веки.

Хлеб небесный в себе имуще, питал еси алчущих, отче, хлебом земным ти присылаемым, да прославится Бог милости и щедрот, и посрамится советская власть велиара.

В любви кротчайший, и в вере твердейший пребыл еси, Викторе, словеса бо Павловы возжелел еси исполнити, яже ни муки ни мразы ни меч от любви Христовы отлучити ны не возмогоша.

Богородичен: Силою твоею, Пречистая, озари люди во тьме неведения сидящая, да уклонятся злых и притекут к мученикам новым, и тех вере последуют, и вкупе с нами прославят Господа.

Песнь 9

Ирмос: Тя, гору Божию усыренную, в нейже благоволи Бог плотию вселитися, Богородицу Марию величаем.

Верую прешел еси, Викторе, мучения от безбожных, и леть сергиеву посрамил еси яко ересь хульную, победителя воистину яви тя Бог, Егоже величаем.

Зырянстии люди питал еси словом и наставлением еже к вере, Викторе, и видеша тя яко Христа щедра и милостива, и прославиша Бога отец наших, Егоже величаем.

Блаженны вы, мученицы новии, Христа бо до смерти возлюбисте, и иже на вас мук не убоявшеся, явили есте нам путь прав и стезю неблазненну к вышнему Царствию.

Богородичен: Радуйся, Марие, серафим и херувим честнейшая, человеком Бога Слова рождающая, смерти врата сокрушившаго и мертвые от гроб воздвигшаго.

Светилен:

Света солнечнаго светлейше мучеников слава, от нихже един бе Виктор Вятский, земли севера озарив своими страданиями, и венец победы прием от Христа светодавца, просвещает души наша.

Слава и ныне: праздника.

На хвалитех стихиры святого, глас 4:

Подобен: Яко добля в мученицех.

Всеял еси, мучениче Викторе, / страдания своими / семя житнетворное / в мертвенное человеческое естество, / и возраде в тебе / клас бессмертия, / егоже поже обильно в небесную житницу, / идеже лица святых сияют / и славят воскресшаго Христа.

Внешняго человека тлеемаго / небрегл еси, Викторе, / паче внутренняго обновляя, / и твердым веры исповеданием / всего себе Богу присвояя, / обрел на небеси славу некончаемую, / нам же тело твое нетленное оставил еси, / яко

Духа скинию божественную, / воскресения
конечного уверительную.

Адаманта веры камня / не возможе тя
сокрушити меч безбожных, / аще и крепко
биюще, но тщи отыдоша, / тем и течение
совершив, / горняго Сиона достигл еси, Викторе
/ с мученики водворяяся, / и почести вышняго
звания прием, / божественного света
наслаждаешися / моли спастися всем нам.

Ученьми твоими пресветлыми святителю, /
упасл еси стадо твое / на пажити евангельстей,
/ и при водах преданий спасительных, / и
безбожия закла отверстая уста, / ярящаяся
верныя поглотити / и имя Христово забвению
предати, / темже твою совершающе память /
поем Воскресшаго из гроба.

Слава, глас 2:

Желанием божественным распалився / и святых
отец предания держа, / удержал еси правду
церковную Викторе, / в годину искушения
противостал еси диаволу, / духом не смущаяся /
и упование имуще на единого Господа, / силен
бо Господь управити Церковь Свою / и мглы и
бури злобы разгнати / аще пребудем Ему
верными до смерти.

И ныне, праздника.

По славословии тропарь святого, Слава и ныне: праздника. Ектении и отпуст, и дается святой елей от кандила святого, и час 1.

На литургии

блаженна праздника, песнь рядовая, и от канона святого песнь 3.

Прокимен праздника и святого, глас 7:
Возвеселится праведник о Господе:

Стих: Услыши, Боже, глас мой:

Апостол дне и святого

Аллилуия дне и святого глас 4: Праведник яко финикс процветет:

Евангелие дне и святого: Луки зачало 67.